

四庫全書

史部

欽定四庫全書

文獻通考卷二百五十四

鄒陽 馬端臨 貴與著

帝系考五

后妃

南史后妃傳叙六宮位號前史代有不同晉武帝采漢魏之制置貴嬪夫人貴人是為三夫人位視三公淑妃淑媛淑儀修華修容修儀婕妤容華充華是為九嬪位

視九卿其餘有美人才人中才人爵視千石以下宋武帝省一才人其餘仍用晉制按貴嬪魏文帝所制夫人魏武帝初建魏國所制貴人漢光武所制淑妃魏明帝所制淑媛魏文帝所制淑儀修華晉武帝所制修容魏武帝所制修儀魏明帝所制婕妤容華前漢舊號充華晉武帝所制美人漢光武所制及孝武孝建三年省夫人置貴妃位比相國進貴嬪比丞相貴人比三司以為三夫人又置昭儀昭容昭華以代修華修儀修容又置

中才人充衣以為散位按照昭儀漢元帝所制昭容孝武
所制昭華魏明帝所制中才人晉武帝所制充衣前漢
舊制及明帝泰始二年省淑妃昭華中才人充衣復置
修華修儀修容才人良人三年又省貴人置貴姬以備
三夫人之數又置昭華增淑容承徽列榮以淑媛淑儀
淑容昭華昭儀昭容修華修儀修容為九嬪婕妤容華
充華承徽列榮凡五職亞九嬪美人才人良人三職為
散役其後帝留心後房擬百官備置內職焉及齊高帝

建元元年有司奏置貴嬪夫人貴人為三夫人修華修儀修容淑妃淑媛淑儀婕妤容華充華為九嬪美人中才人才人為散職三年太子宮置三內職良娣比開國侯寶林比五等侯才人比駙馬都尉及永明元年有司奏貴妃淑妃並加金章紫綬佩于闐玉淑妃舊擬九隸以淑為溫恭之稱妃為亞后之名進同貴妃以比三司夫人之號不殊蕃國降淑媛以比九卿七年復置昭容位在九嬪焉梁武撥亂反正深鑒奢逸配德早終長秋

曠位定令制貴妃貴嬪貴姬為三夫人淑媛淑儀淑容
昭華昭儀昭容修華修儀修容為九嬪婕妤容華充華
承徽列榮為五職美人才人良人為三職東宮置良娣
寶林為二職及簡文元帝出自儲蕃或迫在拘繫或逼
於寇亂且妃竝先殂更不建椒閭陳武光膺天歷以朴
素自居故後宮員位其數多闕文帝天嘉之後詔宮職
備員其所置立無改梁舊編之令文以為後法然帝性
恭儉而嬪嬙不備宣帝後主無所改作今總綴緝以立

此篇云

宋孝懿蕭皇后名文壽蘭陵人武帝繼母帝為宋公宋王加太妃太后受禪尊為皇太后

武敬臧皇后名愛親東莞人適武帝義熙四年殂追贈豫章郡夫人武帝崩祔葬初寧陵

武帝張夫人不知何許人生少帝帝即位尊為皇太后少帝廢太后還璽紱隨居吳縣文帝元嘉初拜營陽國太妃二年薨

文帝胡太后名道女淮南人義熙初武帝納之生文帝
五年被譴死武帝即位追贈婕妤文帝即位上尊號曰
章皇太后陵曰熙寧

少帝司馬皇后名茂英晉恭帝女宋初拜皇太子妃少
帝即位為皇后元嘉初降為榮陽王妃十六年薨

文元袁皇后名齊嬀陳郡陽夏人父湛少適文帝為王
妃生子劭元嘉十七年崩

潘淑妃以色進生子濬後為元凶劭所殺

孝武昭路太后名惠男丹陽建康人以貌入後宮生孝武拜淑媛隨孝武出蕃孝武即位尊為太后

明宣沈太后名容姬為文帝美人生明帝拜婕妤元嘉三十年卒孝武即位追贈太后

孝武文穆王皇后名憲嫺琅邪臨沂人初為武陵王妃生廢帝孝武即位立為皇后廢帝即位尊為皇太后

殷淑儀南郡王義宣女義宣敗帝密取之假姓殷薨追贈貴妃或云貴妃是殷琰家人入義宣家義宣敗入宮

云

前廢帝何皇后名令婉廬江潯人父瑀初為皇太子妃
薨於東宮廢帝即位追謚曰獻皇后

明恭王皇后名貞風琅邪臨沂人初為湘東王妃明帝
即位立為后廢帝即位尊為太后

後廢帝陳太妃名妙登丹陽建康屠家女孝武宮人以
賜明帝生後廢帝拜貴妃廢帝即位尊為皇太妃

後廢帝江皇后名簡珪濟陽考城人初納為太子妃

帝即位為皇后帝既廢降為蒼梧王妃

順帝陳太妃明帝宮人為昭華明帝以桂陽王休範子
令妃養之即位為順帝進為皇太妃

順帝謝皇后名梵境陳郡陽夏人父颺順帝立為皇后
帝禪位降為汝陽王妃

齊武穆裴皇后名惠昭河東聞喜人昇明三年為齊世
子妃建元元年為皇太子妃二年薨武帝即位追尊為
皇太后

文安王皇后名寶明琅邪臨沂人父暄之建元四年為
皇太子妃鬱林王即位尊為皇太后稱宣德宮明帝即
位出居鄱陽王故第梁武定建業迎入宮稱制和帝禪
位遜居外宮梁天監時薨

鬱林王何妃名婧英廬江潯人初為南郡王妃太孫即
位立為皇后帝廢貶為王妃

海陵王王妃名韶明琅邪臨沂人父慈初為鬱林王妃
王即位為皇后王廢降為妃

明敬劉皇后名惠端彭城人明帝納之永明七年卒帝即位贈皇后

東昏褚皇后名令璩河南陽翟人父澄建武初納為皇太子妃東昏即位為皇后東昏廢降為庶人

和王皇后名舜華琅邪臨沂人儉之孫初為隨王妃帝即位為皇后既禪位降為妃

梁武德郝皇后名徽高平金鄉人父暕齊建元末嬪於武帝帝為雍州刺史日殂即位追贈皇后

武丁貴嬪名令光譙國人武帝鎮樊城納之生昭明太子冊為貴嬪普通七年薨

文宣阮太后名令羸會稽餘姚人武帝平建業納為采女生元帝為修容隨出蕃大同六年薨元帝即位追崇為太后

簡文王皇后名靈賓琅邪臨沂人初為晉安王妃大通三年拜皇太子妃薨簡文即位追崇為皇后

元帝徐妃名昭佩東海郟人天監十六年拜為湘東王

妃太清三年以罪死

敬夏太后會稽人元帝納之生敬宗昭泰元年尊為太后明年降為江陰國太妃

敬王皇后琅邪臨沂人初為晉安王妃王即位拜皇后禪位降為江陰王妃

陳武宣章皇后名要兒吳興烏程人武帝聘之受禪立為皇后文帝即位尊為皇太后

文沈皇后名妙容吳興武康人梁大同中歸於文帝武

帝即位為臨川王妃文帝即位為皇后廢帝立為皇太后

廢帝王皇后琅邪臨沂人初為皇太子妃廢帝即位立為皇后帝廢降為臨海王妃至德中薨

宣柳皇后名敬言河東解縣人宣帝在江陵聘之生後主宣帝即位為皇后後主即位尊為皇太后

後主沈皇后名婺華吳興武康人父君理太建三年拜為皇太子妃後主即位立為皇后陳亡入長安隋煬帝

每巡幸恒令從駕煬帝被弑后為尼於毗陵天靜寺貞觀初卒

張貴妃名麗華本兵家女後主為太子選入宮得幸生太子深拜貴妃陳亡為隋軍所殺

北史后妃傳叙魏氏王業之兆雖始於神元然自昭成之前未具言六宮之典而章平思昭穆惠煬烈八帝妃后無聞道武追尊祖妣皆從帝諡為皇后始立中宮餘妾或稱夫人多少無限然皆有品次太武稍增左右昭

儀及貴人椒房等後庭漸已多矣又魏故事將立皇后必令手鑄金人以成者為吉不則不得立也又太武文成保母劬渠之恩並極尊崇之義雖事乖典禮而觀過知仁孝文改定內官左右昭儀位視大司馬三夫人視三公三嬪視三卿六嬪視六卿世婦視中大夫御女視元士後置女職以典內司視尚書令僕作司大監女侍中三官視二品監女尚書美人女史女賢人女書史書女小書女五官視三品中才人供人中使女生才人恭

使宮人視四品青衣女酒女饗女食奚官女奴視五品及齊神武文襄俱未踐尊極神武嫡妻稱妃其所聘蠕蠕女稱為蠕蠕公主文襄既尚魏朝公主故無別號兩宮自餘姬侍並稱娘而已文宣後庭雖有夫人嬪御之稱然未具員數孝昭內職甚少唯楊妃才貌兼美復是貴家襄城王母桑氏有德行並蒙恩禮其餘無聞焉河清新令內命婦依古制有三夫人九嬪二十七世婦八十一御女又準漢制置昭儀有左右二人比丞相其弘

德正德崇德為三夫人比三公光猷昭訓隆徽為上嬪
比三卿宣徽凝暉宣明順華凝華光訓為下嬪比六卿
正華令則修訓曜儀明淑芳華敬婉昭華光正昭寧貞
範宏徽和德弘猷茂光明信靜訓曜德廣訓暉範敬訓
芳猷婉華明範艷儀暉則敬為二十七世婦比從三品
穆光茂德貞懿曜光貞凝光範令儀內範穆閨婉德明
婉艷婉妙範暉章敬茂靜肅章穆華慎儀妙儀明懿崇
明麗則婉儀彭修閑修靜弘慎艷光漪容徽淑秀儀芳

婉貞慎明艷穆修範肅容茂儀英淑弘艷正信凝婉英
範懷順修媛良則瑤章訓成潤儀寧訓淑懿柔則穆儀
修禮昭慎貞媛肅閨敬順柔華昭順敬寧明訓弘儀崇
敬修敬承閑昭容麗儀閑華思柔媛光懷德良媛淑猗
茂範良信艷華徽娥肅儀妙則為八十一御女比正四
品武成好內並具其員自外又置才人采女以為散號
後主既立二后昭儀以下皆倍其數又置左右娥英比
左右丞相降昭儀比二大夫尋又置淑妃一人比相國

周氏率由姬制內職有序文帝創基修衽席以儉約武
皇嗣歷節情欲於矯枉宮闈有貫魚之美戚里無私溺
之尤可謂得君人之體也宣皇外行其志內逞其欲溪
壑難滿采擇無厭恩之所加莫限廝皂榮之所及無隔
險諛於是升蘭殿以正位踐椒庭而齊體者非一人焉
階房帷而拖青紫緣恩幸而擁玉帛非一族焉雖辛癸
之荒淫趙李之傾惑曾未足比其髣髴也人厭苛政弊
事實多文帝之祀忽諸特由於此隋文思革前弊大矯

其失惟皇后當室傍無私寵婦官位號未詳備焉開皇二年著內官之式略依周禮省減其數嬪三員掌教四德視正三品世婦九員掌賓客祭祀視正五品女御三十八員掌女功絲枲視正七品又采漢晉舊儀置六尚六司六典遞相統攝以掌宮掖之政一曰尚書掌導引皇后及閨閣稟賜管司令三人掌圖籍法式糾察宣奏典琮三人掌琮璽器玩二曰尚儀掌禮儀教學管司樂三人掌音律之事典贊三人掌導引內外命婦朝見三

曰尚服掌服章寶藏管司飾三人掌簪珥花嚴典櫛三人掌巾櫛膏沐四曰尚食掌進膳先嘗管司醫三人掌方藥卜筮典器三人掌罇彝器皿五曰尚寢掌帷帳牀褥管司筵三人掌鋪設洒掃典執三人掌扇傘燈燭六曰尚工掌營造百役管司製三人掌衣服裁縫典會三人掌財帛出入六尚各三員視從九品六司視勲品六典視流外二品初文獻皇后功參歷試外預朝政內擅宮闈懷嫉妬之心虛嬪妾之位不設三妃防其上逼自

嬪以下置六十員又加抑損服章降其品秩至文獻崩後始置貴人三員增嬪至九員世婦二十七員御女八十一員貴人等闕掌宮闈之務六尚以下皆分隸焉煬帝時后妃嬪御無釐婦職唯端容麗飾陪從宴游而已帝又參詳典故自制嘉名著之於令貴妃淑妃德妃是為三夫人品正第一順儀順容順華修儀修容修華充儀充容充華是為九嬪品正第二婕妤一十二員品正第三美人才人一十五員品正第四是為世婦寶林二十

員品正第五御女二十四員品正第六采女三十七員品正第七是為女御總一百二十以叙於燕寢又有承衣刀人皆趨侍左右並無員數視六品以下時又增置女官準尚書省以六局管二十四司一曰尚宮局管司言掌宣傳奏啓司簿掌名錄計度司正掌格式推罰司闡掌門閤管籥二曰尚儀局管司籍掌經史教學紙筆几案司樂掌音律司賓掌賓客司贊掌禮儀贊相導引三曰尚服局管司璽掌琮璽符節司衣掌衣服司飾

掌湯沐巾櫛玩弄司仗掌仗衛戎器四曰尚食局管司膳掌膳羞司醢掌酒醴醢醢司藥掌醫巫藥劑司膳掌廩餼柴炭五曰尚寢局管司設掌牀席帳帷鋪設洒掃司輿掌輿輦傘扇執持羽儀司苑掌園籞種植蔬菜瓜果司燈掌火燭六曰尚工局管司製掌營造裁縫司寶掌金玉珠璣錢貨司綵掌繪帛司織掌織染六尚二十二司員各二人唯司樂司膳員各四人每司又置典及掌以貳其職六尚十人品從第五司二十八人品從第

六典二十八人品從第七掌二十八人品從第九女使
流外量局開劇多者十人以下無定員數聯事分職各
有司存焉

魏獻明皇后賀氏東部大人野干女生道武皇始元年
崩後追加尊號

道武皇后慕容氏寶之季女中山平入宮得幸後立為
皇后

道武宣穆皇后劉氏劉眷女登國初納為夫人生明元

以鑄金人不成故不登后位魏故事後宮產子將為儲貳其母皆賜死道武末年后以舊法崩明元即位追尊位

明元昭哀皇后姚氏姚興女明元納為夫人後薨追贈后

明元密皇后杜氏魏郡鄴人以良家子選入太子宫生太武拜貴嬪薨太武即位追尊為后

太武保母竇氏初以夫家坐事誅入宮明元命為太武

保母太武即位尊為皇太后

太武皇后赫連氏屈丐女太武平統萬納之為貴人後
立為皇后文成初崩

太武景哀皇后賀氏代人初為夫人生景穆薨追贈貴
嬪

景穆恭皇后郁久閭氏河東王毗之妹以選入東宮生
文成薨文成即位追上尊號

文成乳母常氏本遼西人因事入宮乳文成帝即位尊

為皇太后

文成文明皇后馮氏長樂信都人父朗坐事誅后遂入宮以選為貴人後立為皇后獻文即位尊為皇太后

文成元皇后李氏梁國蒙縣人太武南征得之後入文成宮中生獻文拜貴人後諡元皇后

獻文思皇后李氏中山安喜人以選入宮為夫人生孝文後追諡

孝文貞皇后林氏平涼人父勝坐法誅遂入掖庭生皇

子恂薨追謚后

孝文廢后馮氏太師熙之女太和十七年立為后後以寵衰廢為尼

孝文幽皇后馮氏亦熙之女入宮拜昭儀後立為皇后坐淫恣廢死葬以后禮

孝文文昭皇后高氏司徒公肇之妹以選入宮生宣武葬謚貴人宣武即位追上尊號

宣武順皇后于氏太尉烈弟勁之女選入宮為貴人帝

即位立為后崩

宣武皇后高氏文昭皇后弟優之女入宮為貴嬪帝即位立為后明帝即位尊為皇太后

宣武靈皇后胡氏安定臨涇人司徒國珍女入掖庭為允華生明帝帝即位尊為皇太妃後又尊為皇太后

孝明皇后胡氏靈太后從兄盛之女帝即位立為皇后武泰初入道為尼

孝武皇后高氏齊神武長女帝立納為后帝西幸關中

降為彭成王妃

文帝文皇后乙弗氏河南洛陽人其先世吐谷渾渠帥父瑗文帝納為妃即位冊為皇后後帝結昏蠕蠕后遜居別宮為尼卒以嫌賜自盡

文帝悼皇后郁久閼氏蠕蠕主阿那瓌之長女蠕蠕屢犯邊帝乃納其女為后二年崩

少帝皇后宇文氏周文帝女帝為太子納為妃即位為皇后帝既廢崩后亦以忠於魏室罹禍

恭帝皇后若干氏司空長樂正公惠之女恭帝納之為
后後出家為尼

孝靜皇后高氏齊神武第二女天平四年聘為皇后齊
受禪降為中山王妃後再嫁於楊愔

齊武明皇后婁氏名昭君贈司徒內干之女神武聘之
既秉政封渤海王拜為王妃凡孕六男二女文宣受禪
尊為皇太后

蠕蠕公主蠕蠕主郁久閭阿那瓌之女神武以蠕蠕屢

犯邊聘其女神武崩文襄從其國法蒸焉產一女

彭城太妃爾朱氏榮之女魏孝莊后神武納為別室生子浹後為尼天保初為太妃為文宣所殺

馮翊太妃鄭氏名大車初為魏廣平王妃神武納之生馮翊王潤

文襄敬皇后元氏魏靜帝之姊初為世子妃文宣受禪尊為文襄皇后居靜德宮武平中崩

文宣皇后李氏名祖娥趙郡李希宗女為文宣妃帝受

禪立為皇后孝昭即位號昭信皇后武成即位逼淫之
遂為尼齊亡入周隋時卒

北齊皇帝納后之禮納采問名納徵訖告園丘方澤
及廟是日皇帝臨軒命太尉為使司徒副之持節詣
后行宮東向奉璽綬以冊授中常侍皇后受冊於行
殿使者與公卿以下皆拜有司備迎禮太尉太保受
詔而行主人公服迎拜於門使者入升自賓階東面
主人升自阼階西面禮物陳於庭設席於兩楹間童

子以璽書版升主人升跪受送者拜於大門外有司
先於昭陽殿兩楹間供帳為同牢之具皇后服大嚴
繡衣帶綬佩加幃女長御引出升畫輪四望車女侍
中負璽陪乘鹵簿如大駕皇帝服袞冕出升御座皇
后入門大鹵簿位門外小鹵簿入到東上閣施步障
降車席導以入昭陽殿前至席位姆去幃皇后先拜
後起皇帝後拜先起升自西階詣同牢座與皇后俱
坐各三飲訖又各酌二爵一盞奏禮畢后興南向立

皇帝御太極殿王公以下拜表謝又明日以榛栗棗脩見皇太后於昭陽殿擇日羣官上禮又擇日謁廟皇帝使太尉先以太牢告而後遍見羣廟

孝昭皇后元氏開府元璽女初為常山王妃孝昭即位立為皇后武成立降居順成宮齊亡入周隋時卒

弘德夫人李氏趙郡李叔讓女初為魏靜帝嬪武成納之生南陽王仁為太妃

武成皇后胡氏安定胡延之女生後主武成立為皇后

後主立尊為皇太后

後主皇后斛律氏左丞相光之女初為皇太子妃後主受禪立為皇后光被害后廢後為尼齊亡再適開府元仁

北齊皇太子納妃禮皇帝遣使納采有司備禮物會畢使者受詔而行主人迎於大門外禮畢會於廳事其次問名納吉並如納采納徵則使司徒及尚書令為使備禮物而行請期則以太常宗正卿為使如納

采親迎則太尉為使三日妃朝皇帝於昭陽殿又朝
皇后於宣光殿擇日羣臣上禮他日妃還又他日皇
太子拜閣皇太子及王聘禮納采問名納吉請期親
迎皆用羔羊一口鴈一隻酒黍稷米麵各一斛納徵
用元三匹纁二匹束帛十匹大璋一虎皮二錦綵六
十匹絹二百匹羔羊一口羊四口犢二頭酒黍稷
米麵各十斛從車貳乘

後主皇后胡氏隴西王長仁女入宮為昭儀斛律后廢

立為皇后後以忤胡太后廢為尼齊亡後亦改嫁

後主穆皇后名邪利本斛律氏從婢入宮得幸生皇子
恒胡皇后廢立為后齊亡不知所終

馮淑妃名小憐穆后從婢穆后愛哀妃有寵封淑妃齊
亡入周以賜代王達

周文宣叱奴皇后代人周文帝為丞相納之生武帝帝
即位尊為皇太后

孝閔皇后元氏名胡摩魏文帝女為略陽公尚馬及踐

祚立為皇后帝被廢后為尼晉公護誅上尊號為孝閔
皇后居崇義宮隋革命出居里第大業時卒

明敬皇后獨孤氏太保衛公信長女帝在藩納為夫人
即位立為皇后崩與帝合葬昭陵

武成皇后阿史那氏突厥可汗女武帝時突厥強故聘
其女為后宣帝即位尊為皇太后

武皇后李氏名娥娑楚人江陵平沒入宮周文以賜武
帝得幸生宣帝宣政元年尊為皇太后

宣皇后楊氏名麗華隋文帝長女帝為太子納為妃即位立為后靜帝即位為皇太后

宣帝后朱氏名滿月吳人其家坐事没入東宮宣帝幸之生靜帝立為天元皇后

宣帝后陳氏潁川人以選入宮拜德妃立為天左皇后帝崩出俗為尼唐永徽初卒

宣帝皇后元氏名樂尚河南洛陽人開府晟之女入宮為貴妃後立為天右皇后帝崩出俗為尼貞觀中卒

宣帝皇后尉遲氏名繁熾蜀公迥之孫女初適杞公亮子溫以宗婦入廟帝逼幸之亮謀逆誅遂入宮為天右大皇后帝崩出俗為尼開皇十五年卒

靜帝司馬皇后名令姬消難之女納為后二年隋文以后父奔陳廢為庶人後嫁為隋司州刺史李丹妻

隋文獻皇后獨孤氏名伽羅河南洛陽人周大司馬衛公信之女文帝受禪立為皇后仁壽二年崩年五十九宣華夫人陳氏陳宣帝女陳亡入掖庭文獻后崩進位

為貴人後拜宣華夫人煬帝時卒

容華夫人蔡氏丹陽人陳亡以選入宮拜為貴人後加號容華夫人煬帝時卒

煬帝愍皇后蕭氏梁明帝歸之女文帝聘為晉王妃煬帝即位立為皇后煬帝遇弒後沒於竇建德突厥可賀敦隋義城公主使迎之入虜庭唐貞觀四年破突厥以禮致之歸於京師賜宅於興道里二十一年殂詔以皇后禮合葬於揚州煬帝陵

隋皇太子納妃禮皇帝臨軒使者受詔而行主人俟於廟門使者執鴈主人迎拜於大門之東使者入升自西階立於楹間南面納采訖仍行問名儀事畢主人請致禮於從者禮有幣馬其次擇日納吉又擇日以玉帛乘馬納徵又擇日告命又擇日命有司以特牲告廟冊妃皇太子將親迎皇帝臨軒醮而誡曰往迎爾相承我宗事勗帥以敬對曰謹奉詔既命羽儀而行主人几筵於門外西面拜皇帝太子答拜主人

揖皇太子先入主人升立於阼階西面皇太子升進
當房戶前北面跪奠鴈俛伏興拜降出妃父進西面
戒之母於西階上施衿結帨及門內施鞶申之出門
妃升輅乘以几姆加幃皇太子乃馭輪三周馭者代
之皇太子出大門乘輅羽儀還宮鷄鳴夙興以妃朝
奠筭音煩於皇帝皇帝撫之又奠筭於皇后皇后撫之
席於戶牖間妃立於席西祭奠而出

唐舊制皇后之下有貴妃淑妃德妃賢妃各一人為夫

人正一品昭儀昭容昭媛修儀修容修媛充儀充容充媛各一人為九嬪正二品婕妤九人正三品美人九人正四品才人九人正五品寶林二十七人正六品御女二十七人正七品綵女二十七人正八品以備周禮六宮之數其外又有尚官尚儀尚服尚食尚寢尚功分掌宮中服御藥膳之事宮正糾憊失形史紀功書過龍朔二年改易官名置贊德二人正一品以代夫人宣儀四人正二品以代九嬪承門五人正四品以代美人承旨

五人正五品以代才人衛仙六人正六品以代寶林供奉八人正七品以代御女持節二十人正八品以代綵女又置侍巾三十人正九品咸亨二年復舊高祖太宗除隋之亂政未下車而大放宮女正位配尊惟其舊德宮閭之職備員而已所謂刑于內以正乎外及高宗永徽之後政出宮中公卿大夫罔不憚服其取威也多山陵未畢而冢嗣再廢遂掘剪皇室改立宗社非一朝一夕之故其所由來漸矣及中宗追王韋氏崇寵三思使

以先朝故事尊誘之於是慶雲之瑞宣於朝廷桑女之歌布於天下防閑之道大壞逆亂之謀構矣卒以禍敗為後王誠元宗即位大加懲革內外有別家道正矣按杜氏通典內官有惠妃麗妃華妃正一品淑儀德儀賢儀婉儀芳儀六人正二品美人四人正三品才人七人正四品與正史所載率皆不同其名號亦有見於國史但不詳所出今疏之於後以示廣記

容齋洪氏隨筆曰自漢以來帝王妃妾之多唯漢

靈帝吳歸命侯晉武帝宋蒼梧王齊東昏陳後主
晉武至於萬人唐世明皇為盛白樂天長恨歌云
後宮佳麗三千人杜子美劔器行云先帝侍女八
千人蓋言其多也新唐史所叙謂開元天寶中宮
嬪大率至四萬嘻其甚矣隋大業離宮徧天下所
在皆置宮女故裴寂為晉陽宮監以私侍高祖及
高祖義師經過處悉罷之其多可想

吳氏能改齋漫錄曰忽看金輿向月陂宮人按著

便相隨恰從中尉門前過當處教看卧鴨池王建
宮詞也按唐著作佐郎崔令欽教坊云左右兩教
坊右多善歌左多工舞外有水泊俗號月陂陂形
如偃月也故王建述此又言妓女入宜春院謂之
內人亦曰前頭人常在上前頭也其家得在教坊
謂之內人四季給米得幸者謂之十家故王建又
宮詞云內人對御疊花牋內人唱好龜茲急內人
相續報花開內人籠脫繫紅條內人恐要秋衣著

內人爭乞洗兒錢

高祖太穆順聖皇后竇氏京兆平陵人父毅周上柱國
歸於高祖隋大業時崩於涿郡年四十五高祖即位追
諡皇后

太宗文德順聖皇后長孫氏河南洛陽人父晟歸於太
宗帝即位為皇后貞觀十年崩年三十六

太宗賢妃徐惠湖州長城人帝聞其文名召為才人永
徽元年卒

高宗廢后王氏并州祁人初納為晉王妃即位立為皇后永徽六年為武才人所譖廢為庶人後為武氏所殺高宗則天順聖皇后武氏并州文水人父士護初為太宗才人帝崩與嬪御皆為尼高宗見而悅之召之宮中生四子譖廢王皇后遂立為后稱天后高宗崩為皇太后臨朝

中宗和思順聖皇后趙氏京兆長安人父瓌帝為英王聘為妃後為武氏所殺神龍初追諡后中宗崩韋庶人

既廢有司乃請以后祔定陵

中宗庶人韋氏京兆萬年人父元貞帝在東宮被選為妃嗣聖初立為后後隨帝遷房陵帝復位復正中宮唐隆元年弑帝臨淄王隆基討而誅之追廢為庶人

尚官昭容名婉兒父儀得罪死没入掖庭武后時掌內詔命中宗復位拜昭容後以韋氏黨為臨淄王所誅

睿宗肅明順聖皇后劉氏帝在藩納為妃即位立為皇后帝降號皇嗣復為妃後為武后所殺景雲元年追諡

睿宗昭成順聖皇后竇氏父孝諱帝即位為德妃生元宗與劉后俱為武后所殺葬於宮中秘莫知帝崩並招魂祔葬橋陵

初太常加諡曰大昭成或言法宜引聖真冠諡而曰大昭成非也以單言配之應曰聖昭若睿成以復言配之應曰大聖昭成聖真昭成又引太穆皇后始諡穆及高祖崩合帝諡曰太穆追增太穆神皇后文德皇后始諡文德及太宗崩合諡文德聖皇后又援范

暉著漢光烈等為比太常謂暉以帝號標后諡是史
家記事體婦人非必與夫同也入廟稱后繫夫在朝
稱太繫子文母生號也文王既沒諡也周公豈以夫
從婦乎漢法不可以為據制曰可天寶八載制詔自
太穆而下六皇后並增上順聖二諡云

元宗皇后王氏同州下邳人梁冀州刺史神念裔孫帝
為臨淄王聘為妃即位立為皇后開元十二年以罪廢
為庶人寶應初追復后號

元宗貞順皇后武氏父攸止幼入宮帝即位得幸封惠妃禮秩比皇后生壽王瑁薨贈皇后及諡

元宗元獻皇后楊氏父知慶帝在東宮為良媛生肅宗為貴嬪肅宗即位追諡皇后

元宗貴妃楊氏蒲州永樂人父元琰幼孤養叔父家始為壽王妃帝悅之乃令其丐為女官號太真潛納之宮中天寶初冊貴妃安祿山反上幸蜀陳元禮等誅楊國忠賜妃死時年三十八

肅宗廢后庶人張氏鄧州向城人父去逸帝在東宮為良娣乾元初拜淑妃繼立為皇后帝大漸后謀廢太子李輔國等矯詔廢而殺之

肅宗章敬皇后吳氏濮州濮陽人父令珪坐事死故后幼入掖庭元宗以賜帝幸之生代宗年十八薨代宗即位追尊為后合葬建陵

代宗貞懿皇后獨孤氏父頴帝即位冊貴妃生韓王迥大歷十年薨追號為皇后

代宗睿真皇后沈氏吳興人開元末以良家子入東宮太子以賜廣平王生德宗天寶亂賊囚后東都王入洛方北討而河南再為史思明所陷遂失太后所在德宗立訪求不得建中初上皇太后尊號憲宗即位詔以大行啓殯日為后發哀內殿上太皇太后諡冊祔代宗廟德宗昭德皇后王氏本仕家子帝為魯王時納為嬪生順宗既即位冊號淑妃貞元三年冊為后其年后崩

德宗賢妃韋氏以戚里舊族為良娣德宗貞元四年冊

拜賢妃帝崩自表留奉崇陵園元和時薨

順宗莊憲皇后王氏琅邪人代宗時以良家選入宮為才人順宗在藩以才人賜之生憲宗冊為良娣憲宗內禪尊為太上皇后

憲宗懿安皇后郭氏汾陽王子儀之孫父曖憲宗為廣陵王聘以為妃生穆宗元和元年進冊貴妃羣臣請立為后帝以掖庭多嬖豔恐后得尊位鉗掣不得肆故終不立穆宗嗣位尊為皇太后

憲宗孝明皇后鄭氏丹陽人初為李錡侍人錡反誅入掖庭帝幸之生宣宗宣宗為光王為王太妃帝即位尊為皇太后

穆宗恭僖皇后王氏越州人本仕家子侍帝東宮生敬宗長慶時冊為妃敬宗立尊為皇太后

穆宗貞獻皇后蕭氏閩人穆宗為建安王后得侍生文宗文宗立尊為皇太后

穆宗宣懿皇后韋氏失其先世穆宗為太子得侍生武

宗長慶時冊為妃武宗立妃已亡追冊為皇太后

尚宮宋若昭貝州清陽人世以儒聞父廷芳能辭章生
五女皆警慧善屬文長若莘次若昭若倫若憲若荀莘
昭文尤高皆不肯與寒鄉凡裔為姻對貞元中昭義節
度使李抱真表其才德德宗召入禁中試文章經史大
義悉留之宮中高其風操不以妾侍命之呼學士若莘
卒若昭嗣拜尚宮歷憲穆敬三朝皆呼先生后妃與諸
王率以師禮見昭寶歷初卒若憲代司秘書後以罪賜

死

敬宗貴妃郭氏父義長慶時妃以容入太子宮太子即位為才人生晉王普進為貴妃文宗時薨

武宗賢妃王氏邯鄲人失其世年十三入宮穆宗以賜
賴王王嗣位進號才人帝崩才人亦自盡宣宗嘉之贈
賢妃

宣宗元昭皇后鼂氏不詳其世少入邸見寵帝即位為
美人生懿宗大中時薨贈昭容懿宗立追尊為皇太后

懿宗惠安皇后王氏亦失所來咸通中冊貴妃生晉王
七年薨後王即位為僖宗追尊為皇太后

懿宗淑妃郭氏幼入鄆王邸即位以為美人進拜淑妃
黃巢之亂流落不知所終

懿宗恭憲皇后王氏其出至微咸通中得幸生壽王王
立是為昭宗追號皇太后

昭宗皇后何氏梓州人系族不顯帝為壽王納之即位
號淑妃後冊為皇后帝遇弒哀帝即位尊為皇太后後

卒為朱全忠所害



文獻通考卷二百五十四

欽定四庫全書

史部
文獻通考卷二百五十五

詳校官內閣學士臣瑞保

編修臣程嘉謨覆勘

覆校官中書臣孫希旦

校對官中書臣金光悌

謄錄舉人臣秦朴

欽定四庫全書

文獻通考卷二百五十五

鄱陽馬端臨 貴與著

帝系考六

后妃

唐開元禮

皇帝納后儀

告圜丘

卜日告圜丘方澤並如時巡告祭儀其祝文臨時撰

臨軒命使

將行納采制命太尉為使者宗正卿為副使吏部承以

戒之

問名納徵納吉告期并奉迎並同使

前一日尚書舍奉御設幄座於

太極殿如常守宮設羣官客使等諸應陪位者次於東

西朝堂太樂令展宮懸於殿庭設舉麾位於殿上一位

於懸下鼓吹令設十二案乘黃令陳車輅尚輦奉御陳

輿輦皆如元日之儀典儀設文官一品以下五品以上

位於懸東六品以下於橫街南皆重行西面北上設武
官一品以下五品以上位於懸西六品以下於橫街南
當文官皆重行東面北上設朝集使位各分方於文武
官當品之下設諸親位於四品五品之下

皇帝親在東
異親親在西

設蕃客位各分方於朝集使六品之南諸州使人分方
位於朝集使九品之後設典儀位於懸東北贊者二人
在南少退俱西向設使者受命位於大橫街南道東副
使又於其東少退俱北面奉禮設門外位於東西朝堂

如元日儀其日諸衛勒所部列黃麾仗如常儀羣官依
時刻集朝堂俱就位各服其服通事舍人引就朝堂前
位侍中量時刻版請中嚴鉞戟近仗入陳於殿庭太樂
令帥工人就舞位協律郎入就舉麾位諸侍衛之官各
服其器服符寶俱就閣奉迎典儀帥贊者先入就位通
事舍人引羣官入就位又引使副入立於太極門外道
東西面黃門侍郎引主節執幡節中書侍郎引制書案
立於左延明門內道北西面北上侍中版奏外辨皇帝

服袞冕御輦以出曲直華蓋警蹕侍衛如常儀皇帝將出仗動出自西房即御座南向符寶郎奉寶置於御座如常通事舍人引使主副入就位定典儀曰再拜贊者承傳羣官在位者皆再拜侍中前承制降詣使者東北西面稱有制使主副俱再拜侍中宣制曰納某官女為皇后命公等持節行納采等禮宣訖使主副又再拜侍中還侍位黃門侍郎引主節於使者東北西面授使者使者受付主節主節立於使後黃門侍郎退中書侍郎

引制書案立於使者東北西面中書侍郎取制書

持案退自

使後立於使者之左

西面授使者使者受制書置於案持案者退

立於使後中書侍郎退典儀曰再拜贊者承傳羣官在位者皆再拜舍人引使者主副出持節者前導持案者次之侍中前跪奏稱侍中臣某言禮畢俛伏興還侍位皇帝降座御輿入自東房侍衛警蹕如來儀舍人引羣官在位以次出初使主副乘輅備儀仗而行鼓吹備而不作從者乘車以從其制書油絡網犢車載而行自後

皆如之

納采

前一日守宮設使者次於后氏大門外道右南向其日

大昕使主副至於后氏大門外掌次者迎入次

凡賓主及行事

者皆公服

主人受於廟

無廟者受於正寢

掌事者設神席於室戶外

之西莞筵紛純加藻席畫純南向右雕几使主副出次
謁者引立於大門外之西東面北上持幡節者立於使
者之北少退東面令史二人對舉制案立於使者之南

執鴈者又在其南俱東面主人立於大門內西面儻者立於主人之左北面受命出立門東西面曰敢請事使者曰某奉制納采儻者入告主人曰臣某之女若如人既蒙制訪臣某不敢辭儻者出告入引主人出迎使者於大門外之南北面主人再拜使者不答拜主人揖使者先入於階使者及宗正卿入幡節先導其持節案及執鴈者從入幡節立西階之西東門

自後幡節皆如之

使者由

西階升於兩楹間南面使副在使者西南執案及執鴈

者在使副西南俱東面主人升阼階詣使者前北面持
案者以案進使副前使副取制書持案者退復位使副
奉制書進授使者退復位持節者脫節衣使者曰有制
主人再拜宣制畢主人降詣階間北面再拜稽首訖升
進北面受制書退以授左右仍北面立使副取鴈以授
使者退復位使者受鴈主人再拜進受鴈退以授左右
仍北面立儼者引二人對舉答表案進於主人後少西
儼者取表以授主人主人進授使者訖退復位再拜持

節者加節衣謁者引使者及使副等降自西階以出

制文

凡六禮皆以版長一尺二寸博四寸厚八分后家答版亦如之

皇帝曰咨具官封姓渾元資始肇經人倫爰及夫婦以奉天地宗廟社稷謀於公卿咸以為宜率由舊典今使持節太尉封某宗正卿封某以禮納采

答文

皇帝嘉命訪婚陋族備數采擇

姑姊妹則云先
目某官之遺女

未開教

訓衣履若如人欽承舊章肅奉典制某官封臣姓名稽

首頓首再拜承制詔

問名

使者既出遂立於內門外之西東向並如納采位初使者降主人降立於內門內東廂西面儻者進受命出請事使者曰將加卜筮奉制問名儻者入告主人曰臣某之子若如人既蒙制訪臣某不敢辭儻者出告入引主人出迎使者至主人受鴈訖出如納采儀使者出立於內門之西使副在南少退俱東面初使者降主人使者

立於東階下西面儗者進受命出請事使者曰禮畢儗者入告主人曰某公奉制至於某之室某有先人之禮請禮從者儗者出告使者曰某既得命將事敢辭儗者入告主人曰先人之禮敢固以請儗者出告使者曰某辭不得命敢不從儗者入告遂引主人升立於序端掌事者徹几改設二筵東上

各用莞筵紛純
加藻席績純

設甒醴於東

房西牖下加勺罍站在罇北實觶二角柶二各一籩一豆實以脯醢在坫北又設洗於東階東南如常訖儗者

引主人降迎使者於內門外之東西面揖使者先入使
者入門而左副從之主人入門而右至階主人曰請某
位升使者曰某敢辭主人曰固請某位升使者曰某敢
固辭主人曰終請某位升使者曰某敢終辭主人升阼
階使者升西階副從升俱北面主人阼階上北面再拜
使者及副西階上北面答再拜主人受几於序端掌事
者內拂几三奉兩端西北向以進主人東南向外拂几
三振袂內執之掌事者又一人又執几以從主人進西

北向使者序進迎受於筵前東南向以俟主人還東階上北向再拜送使者以几筵進北面跪各設於座差退於西階上北面東上俱答再拜立於階西東面南上贊者二人俱升取觶降盥手洗觶升實醴加柶於觶覆之面葉出房南面主人受醴面柄進使者筵前西北面又贊者執觶以從使者西階上北面各一拜序進筵前東南面主人又以次授醴使者受俱復西階上位主人退復東階上北面一拜送掌事者以次薦脯醢於筵前使

者各進升筵皆坐左執觶右取脯擣於醢祭於籩豆間
各以柶祭醴三始版一祭又版再祭興各以柶兼諸觶
上獵降筵於西階上俱北面坐俱啐醴建柶各奠觶遂
拜執觶主人答拜使者進升筵坐各奠觶於薦東降筵
序立於西階上東面南上掌事者牽馬入陳於門內三
分庭一在南北首西上又掌事者奉幣升東階以授主
人主人受於序端進西面掌事者一人又奉幣篚立於
主人之後使者西階上俱北面再拜主人進詣楹間南

面立使者序進立於主人之西俱南面主人以幣篚授使者使者受退立於西階上東面掌事者又以幣篚授主人主人受以授使副使副受退立於使者北俱東面主人還東階上北面拜送使者降西階從者迓受幣使者當庭實揖馬出牽馬者從出使者出大門之外西東面立從者迓受馬主人出門東西面再拜送使者退主人入立於東階下西面僮者告主人曰賓不顧矣主人反於寢使者奉答表詣闕進

制文

皇帝曰咨某官封姓兩儀配合承天統物正位乎內必
俟令族重章舊典今使使持節太尉封某宗正卿封某
以禮問名

答文

皇帝嘉命使者某重宣中制問臣名族臣女夫婦所生
先臣故某官之遺元孫先臣故某官之遺曾孫先臣故
某官之遺孫先臣故某官之外孫女年若干欽承舊章

謹奉典制某官某臣姓某稽首頓首再拜承制詔

若女祖以

上在則直云某官臣之孫女等語

納吉

前一日守宮設使者次以下至主人立於大門內西面如納采儀儼者進受命出請事使者曰加諸卜筮占曰從制某也納吉儼者入告主人曰臣某之女若如人龜筮云吉臣占在焉臣某謹奉典制儼者出告入引主人出迎使者於大門外以下至使者降自西階以出如納

采儀使者出立於內門外之西使副在南少退俱東面
初使者降主人立於東階下西面儼者進受命出請事
使者曰禮畢其賓使者如問名之儀

制文

皇帝曰咨某官姓人謀龜從僉曰貞吉敬順典禮今使
使持節太尉封某宗正卿封某以禮納吉

答文

皇帝嘉命使者某重宣中制太卜元吉臣陋族卑鄙憂

懼不堪欽承舊章肅奉典制某官臣姓某稽首頓首再拜承制詔

納徵

前一日守宮設使者次如初其日大昕使主副至后氏大門外掌次者延入次執事者入布羃於內門外元纁束帛陳於羃上六馬陳於幕南北首西上執事者奉穀珪以匱俟於幕東西掌事者設几筵如初使主副出次謁者引立於大門之外西東南面北上持幡節者立於

使之北少退東面令史二人對舉制案立於使副南東面主人立於大門內西面儼者進受命出請事使者曰某奉制納徵儼者入告主人曰奉制賜臣以重禮某祇奉典制儼者出告入引主人出迎使者於大門外之南北面主人再拜使者不答拜謁者引使者及使副入幃節前導持案者從入使者入門而左主人入門而右至於內門使主副立於門西東面北上主人立於門東西面儼者引主人揖使者先入門至階使副從入由西階

升立於楹間南面使副在使者西南持案者在使副西南俱東面主人由阼階詣使者前北面立執事者坐啟匱取珪加於元纁上及牽馬者從入三分庭一在南北首西上執珪者在馬西俱北面持案者以案進使副前使副取制書持案退復位使副奉制書進授使者退復位持節者脫節衣使者曰有制主人再拜使者宣制畢主人降詣階間北面再拜稽首訖升進北面受制書退以授左右仍北面立僮者引二人對舉答表案進主人

後少西僮者取表以授主人主人受以授使者訖退復位再拜謁者引使者及使副等降自西階以出立於內門外之西使副在南少退俱東面初主人受制書訖左右受玉帛於庭受馬者自左受之以東牽馬者既授馬自前面而出主人降立於東階下西面僮者進受命出請事使者曰禮畢其實使者如納吉之儀

制文

皇帝曰咨某官姓之女有母儀之德窈窕之姿如山如

河宜奉宗廟永承天祚以元纁車馬以章典禮今使使持節太尉封某宗正卿封某以禮納徵

答文

皇帝嘉命使者某重宣中制降婚卑陋崇以上公寵以豐禮備物典冊欽承舊章肅奉典制某官臣姓名稽首頓首再拜承制詔

告期

前一日守宮設使者次以下至出請事如納采儀使者

曰制使某告期儻者入告主人曰臣某謹奉制儻者出告入引主人出迎使者以下至禮畢如納采儀

制文

皇帝曰咨某官姓謀於公卿大筮元龜罔有不臧率導典禮今使使持節太尉封某宗正卿封某以禮告期

答文

皇帝嘉命使者某重宣中制告曰惟某月某日可迎臣欽承舊章肅奉典制某官臣姓某稽首頓首再拜承制

詔

告廟

有司以特牲告如常告禮祝文臨時撰

冊后

前一日守宮設使者次於后氏第大門外之西如常尚
舍設尚宮以下次於后氏閣外道西東向障以行帷其
日臨軒命使如納采命使之儀太尉為正使司徒為副使奉禮設使
者位於大門外之西東向使副及內使位於使者之南

舉冊案及寶綬者在南差退持節者在使者之北少退
俱東面設主人位於大門外之南北面設使者以下及
主人位於內門外亦如之設內謁者監位於內門外主
人之南西面謁者監設司贊位於東階東南掌贊二人
在南差退俱西向內謁者監又先置一案於閤外近限
使主副乘輅持節備儀仗鼓吹備而不作至后氏大門
外使者降輅掌次者延入次尚宮以下至客之次內僕
進重翟以下大門外道西東向北上諸衛令其屬布后

儀仗如常使者出次謁者引使者以下就門外位主人朝服出立於東階下西面儼者進受命出門東西面曰敢請事使者曰某奉制授皇后備物典冊儼者入告遂引主人出迎於大門外北面再拜使者不答拜謁者引使者入門而左持節者前導持案者次之主人入門而右至內門外各就位立定奉冊寶案者進當使副前使副受冊寶持案者退復位使副以冊寶進授使者退復位內侍進使者前西面受冊寶東面授內謁者監復位

內謁者監持冊寶入立於閤外之西東面跪置冊寶於案俛伏興尚宮以下入閤奉后首飾褱衣

其衣服所司先進

傳

姆贊出尚宮引降立於庭中北面尚宮跪取冊尚服跪取寶綬興立於后之右少前西向司言司寶各一人進於后左少前東向尚宮稱有制尚儀贊皇后再拜皇后再拜宣冊訖尚儀又贊皇后再拜皇后再拜尚宮奉冊進授皇后皇后受以授司言尚服又奉寶綬進授皇后皇后受以授司寶訖尚儀贊皇后升座尚宮引皇后升

座南向坐內官以下俱降立於庭重行北向西上立定
司贊曰再拜掌事承傳內官以下皆再拜訖諸應侍衛
者各升立於侍位尚儀前跪奏稱禮畢皇后降座尚宮
引皇后入於宮主人賓使者如告期之儀前使者乘輅
而還詣闕復命

冊文

維某年月日皇帝使使持節太尉封某司徒封某冊命
某官女某氏為皇后咨爾易階乾坤詩首關雎王化之

本實由內輔是故皇英嬪虞帝道以光太妊妣姬周允
克昌皇后其祇勗厥德以肅承宗廟虔恭中饋盡敬於
婦道師道於六宮作範儀於四海皇天無親惟德是依
可不慎歟

命使奉迎

其日晡後侍中量其時刻版奏請中嚴晡後三刻皇帝
服袞冕出升所御殿宮人侍衛如常文武之官五品以
上立於東西朝堂如常儀奉迎前一日守宮設使者次

於大門外道右設使副及內侍次於使者次西俱南向
尚舍設宮人次於閤外道西奉禮設使者位於大門外
之西東向使副位於使者之南持案及執鴈者又在南
差退持節者在使者北少退俱東向奉禮位於使副西
南贊者二人在南差退俱東面設內侍位於大門外道
左西面其日司贊設宮人以下位於堂前使主副朝服
發朝堂乘輅持節備儀仗至大門外使者降輅掌次者
延入位宮人等各之次奉迎文武官至宿衛及列鹵簿

如常儀尚儀奏請皇后中嚴量時刻姆傳導皇后尚宮
前引出升堂宮人等侍衛如常儀皇后將出主婦出於
房外之西南文武奉迎者皆陪立於大門外文東武西
北上位定謁者引使者謁大門外位使副內侍等各就
位主人立於內門外堂前東階下西面儼者受命出請
事使者曰某奉制以今吉辰率職奉迎儼者入告主人
曰臣謹奉典制儼者出告入引主人出門南北面再拜
使者不答拜謁者引使者入門而左持節者前導使副

及持案執鴈者次之主人入門而右至內門外堂西階使者先升立於兩楹間南面使副在使者西南持案及執鴈者在使副西南俱東面主人升東階詣使者前北面立持案者以案進使副前使副取制書持案者退復位使副奉制書授使者退復位使者曰有制主人再拜使者宣制畢主人降詣階間北面再拜稽首訖升進北面受制書退授左右訖主人再拜進受鴈授左右仍北面立僮者引二人對舉答表案進立於主人後少西僮

者取表以授主人主人受以授使者訖退復位再拜謁者引使者及使副降自西階以出復門外位立定奉禮曰再拜贊者承傳使主副俱再拜使者曰今月吉日某等承制率職奉迎內侍受以入傳於司言司言受以奏聞尚儀奏請皇后再拜皇后再拜訖主人升自東階進西面誡之曰戒之敬之夙夜毋違命主人退立於東階上西面毋誡於西階上施衿結帨曰勉之敬之夙夜無違命訖腰輿進皇后升輿以降尚宮前導六尚以下侍

衛如常皇后升重翟以几姆加幃內官侍從及內侍導
引應乘車從者如鹵簿常儀奉迎使及百官當引從者
皆退隨便立俟皇后車出大門外以次乘車馬引從如
常

制文

皇帝曰咨某官姓歲吉月令吉日惟某率由典禮今遣
使持節太尉封某宗正卿封某以禮迎

答文

皇帝嘉命使者某重宣中詔令月吉辰備禮以迎螻蟻之族猥承大禮憂懼戰悸欽承舊章肅奉典制某官臣姓某稽首頓首再拜承詔制

同牢

其日內侍之屬設皇后次於皇帝所御殿門外之東南向鋪座如常將夕尚寢設皇帝御幄於所御之殿室內之東向鋪地席重茵施屏障初昏尚食設洗於東階東南東西當東雷南北以堂深壘水在洗東篚在洗

西南肆

簠實以巾
二爵二

設后洗於東房北壘水在洗西簠

在洗東北肆皆加勺罍饌於東房西牖下籩豆各二十

四簋簠各二甄各三皆加巾蓋俎三罇於室內北牖下

元酒在西加罍勺南柄

罍夏用絺
冬用絺

又罇於房戶外之東

無元酒站在南加四爵合卺

其器皆以漆
惟匏以陶卺以匏

皇后重翟

入大門鳴鐘鼓

其鐘鼓所司先陳設鳴
鼓鐘者所以聲告內外

鹵簿止於外近

侍應從者如常皇后從永巷至大次前迴車南向施步

障畢尚儀進當車前跪奏請降車興退復位皇后降車

御輿司輿率繖扇等司燈率執燭者俱布列前後皇后
入就大次嚴整訖尚宮引皇后詣所御殿門外之東西
向立尚儀跪奏外辨請降座禮迎皇帝降座尚宮前引
詣門內之西東面揖后以入尚食徹罇罍酌元酒三注
於罇尚寢設席於室內之西東向
莞筵紛純加藻席績
純次席黼純對席亦
此準皇帝導后升西階入室即席東向立皇后入立於罇
西南向皇帝盥於南洗皇后盥於北洗尚食率其屬以
饌入設醬於席前俎醢在其北俎三入設於豆東豕俎

特於菹北

豆東菹醢之東

尚食設黍於醬東稷稻粱又在東設

滂於醬南

饌西方也

設對醬於東

對醬后醬也設之當特俎

菹醢在其南

坵上設黍於豕俎北其西稷稻粱設滂於醬北尚食啓會

卻於簋簋之南對簋簋於北

啓發也豆蓋徹於房

各加七箸尚寢

設對席於饌東尚食西面跪奏饌具興皇帝揖皇后對

席西面皆坐尚食跪取韭菹孺醢授皇帝又尚食跪取

韭菹孺醢授皇后皇帝及皇后俱受祭於豆間尚食又

取黍實於左手遍取稷稻粱反於右手授皇帝又尚食

取黍實於左手遍取稷稻粱反於右手授皇后皇帝及
皇后俱受祭於豆間尚食各以肺加於俎司飾二人以
巾授皇帝及皇后俱執手訖尚食各跪品嘗饌訖各移
黍置於席上以次授肺脊皇帝及皇后皆食三飯卒食
尚食二人俱盥手洗爵於房入室詣酒罇所酌酒進授
皇帝及皇后俱受爵祭酒尚食各以肝從皆奠爵振祭
齊之尚食皆受實於菹豆各取爵皆飲訖尚儀俱進受
虛爵奠於坫再醕如初三醕用卮如再醕尚食俱降東

階洗爵升酌於戶外罇進北面俱奠爵興再拜跪取爵
祭酒遂飲卒爵奠爵遂拜執爵奠興降奠於篚還侍立
尚儀北面跪奏稱禮畢興皇帝皇后俱興尚宮引皇帝
入東房釋冕服御常服又尚宮引皇后入幄脫服尚宮
引皇帝入尚食帥其屬徹饌於東房如初皇后從者餽
皇帝之饌皇帝侍者餽皇后之饌

皇后表謝

皇后至宮之日服展衣出司言引尚宮尚宮前導及左

右侍從如常升正殿兩楹間北面立又尚儀以謝表授皇后又尚儀以案俟於前皇后置表案上尚宮贊拜皇后再拜訖尚儀以表降殿授內侍因中書以閤初內侍出門皇后降殿還寢如常

朝皇太后

其日大昕所司設皇太后御座地席於所御之殿南尚食帥司膳設側罇甒醴於東房內東壁下加勺累籩一豆一實以脯醢設於罇北又設洗於罇西近北罍水在

洗西篚在洗東北肆

篚實以巾襦角觶一角柶一

其日皇后夙興沐

浴尚儀版奏請皇后中嚴質明六尚及諸侍衛宮人俱詣於寢殿奉迎尚儀版奏外辨皇后服褱衣加首飾御輿尚宮前導降自西階以出侍衛如常至皇太后閣外皇后降輿障扇侍從如常立於西廂東面皇后將至尚儀奏請皇太后中嚴皇后既至閤外尚儀奏皇太后外辨皇太后服褱衣首飾司言引尚宮尚宮引皇太后出即御座前南向坐侍從如常皇后執筭棗栗脯脩司言

引尚宮尚宮引皇后入升西階北面再拜司言引尚儀
尚儀引皇后進跪奠筭於皇太后座前皇太后撫之尚
食進徹以東司言引尚宮尚宮引皇后退北面又再拜
司設設皇后席於戶牖之間近北南向司言引尚宮尚
宮引皇后立於席西南向尚食於東房盥手洗觶酌醴
加柶面柄出進詣皇后席前北向立皇后進北面再拜
受醴尚食薦脯醢於席前皇后升席坐左執觶右取脯
擣於醢祭於籩豆間以柶祭醢三始扱一祭又扱再祭

加柶於觴面葉興降席北面跪啐醴建柶興北面再拜
進升席跪奠觴於薦東興降席司言引尚宮尚宮引皇
后降自西階以出御輿而還侍從如來儀初皇后出閤
尚儀跪奏稱禮畢俛伏興還侍位皇太后降座入室如
常

皇后受羣臣賀

右如正冬賀儀唯辭云具官臣某等言伏惟殿下徽猷
昭備至德應期凡厥黔黎不勝慶躍

皇帝會羣臣

右如正冬會儀唯樂備而不作又上壽辭云具官臣某等言伏惟皇后坤儀配天德昭厚載克榮萬葉明嗣徽音凡厥元庶載懷鳧藻臣等不勝慶忭謹上千秋萬歲壽

外命婦朝會

右如正冬朝會唯賀辭云某位妾姓等言伏惟殿下坤象配天德昭厚載率土含識不勝忭舞會辭唯嘉謹上

千萬歲壽

羣臣上禮

如加元服上禮之儀

皇后廟見

前一日皇后清齋於別殿內官應從入廟者俱清齋一日於殿所諸衛令其屬晡後一刻各以其方器服守衛廟門與太樂工人俱清齋一宿前二日尚舍直長施皇后大次於太廟北門內之西東向周以行帷尚舍奉御鋪御座尚舍直長又量設內官以下次於大次之後守

宮設外命婦妃主以下次於廟北門外之西道北南向
東上周以行帷設行事太尉以下次於齋坊之內太樂
令設宮懸之樂於廟庭如式前一日右校清掃內外內
謁者監設皇后版位於樂懸之北道西北向設外命婦
位於其次前北面東上奉禮設太尉以下及御使等位
於內外並如常儀設酒罇之位於廟堂上前楹間各於
室戶之左北向每室彝二罇二春夏用雞彝罇秋
冬用斚黃彝著罇山罍
二皆加勺簠皆西上各有坫以置爵設洗於東階東南北

向以下至太祝持版如加元服謁廟儀太祝持版進於室戶外之右東向跪讀祝文曰維某年歲次月朔日子

孝曾孫開元神武皇帝某

太祖以下稱臣某

謹遣太尉封臣名

敢昭告於皇祖某謚皇后某氏

太祖以下廟則稱妾某氏

將伸祗見

謹以一元太武明業薈嘉蔬嘉薦醴齊敬薦尚饗訖

興太尉再拜初讀祝文樂作太祝進跪奠版於神座前

俛伏興還蹲所太尉拜訖樂止謁者引太尉以次獻如

祖之儀

惟不盥洗

徧獻訖以下如加元服謁廟儀唯執事則

每事訖還齋所

車駕出宮

前出宮三日本司宣攝內外各供其職其日晝漏上水

四刻車駕出宮發引前七刻槌一鼓為一嚴

三嚴時刻前一日内

侍中奏裁發引前五刻槌二鼓為再嚴尚儀版奏請中嚴司

贊設內命婦版位於皇后所御殿閣外道東重行西向
北上內命婦各服其服所司陳小駕鹵簿發引前二刻
槌三鼓為三嚴司賓引內命婦各就位六尚以下各服

其服俱詣室奉迎

尚服負壘如式

內僕進重翟於閤外尚儀版

奏外辨馭者執轡皇后首飾褙衣乘輿以出警蹕侍衛如常儀皇后升車仗衛如常六尚等乘車陪從如式司賓引內命婦退隨近以俟諸翊駕之官皆乘馬駕動稱警蹕如常不鳴鼓角諸衛前後督攝如常外命婦三品以上及公主縣主皆先至各就次俱服其服車駕將去內外之屬守廟四門內謁者贊外命婦妃主等出次內典引引就位立駕過引還次初駕將至內侍之屬守廟

四門駕至廟北門迴車北向尚儀進當前跪奏稱尚儀
妾姓言請降車興還侍位皇后降車升輿入大次繳扇
華蓋侍衛如常儀鹵簿停於廟外皇后停大次半刻頃
司言引尚宮立於大次門外當門西向尚儀版奏外辨
皇后出次侍衛如常

尚服負壘
陪從如式

司言引尚宮尚宮引皇

后

凡尚宮前導
皆司言先引

至版位北向立尚宮與司言退立於左

皇后立定尚宮前奏請再拜皇后再拜少頃尚宮又奏
請再拜皇后又再拜見司言引尚宮尚宮引皇后還大

次內侍版奏請解嚴

將士不得輒離部伍

皇后停大次半刻頃槌

一鼓為一嚴轉仗衛於還途如來儀三刻頃槌二鼓為

再嚴尚儀版奏請中嚴皇后改著鈿釵禮衣五刻頃槌

三鼓為三嚴六尚以下詣大次奏迎內僕進重翟於廟

北門外尚儀版奏外辨馭者執轡皇后乘輿出次華蓋

侍衛如常皇后升車鼓吹振作而還六尚等升車陪從

如來儀皇后將出門內謁者贊引外命婦等出次內典

引引就位駕至位所內侍奏請駕權停外命婦再拜訖

內侍承令令外命婦還外命婦又再拜車駕還內典引
引外命婦各還第駕至所御殿閤外迴車南向尚儀進
當車前跪奏稱尚儀妾姓言請降車還侍位皇后降車
輿以入侍衛如常於車駕將至司賓引內命婦俱就位
皇后既入司賓引內命婦退內侍版奏請解嚴將士各
還其所

皇帝臨軒冊命皇后儀

卜日告園丘方丘太廟並有司行事如常告儀

臨軒命使

將行冊禮所司奏請太尉為使司徒為副前一日尚舍奉御設御幄於太極殿庭陳設樂懸內外官次侍衛警蹕並如納后儀皇帝將出仗動太樂令令撞黃鍾之鐘右五鐘皆應協律郎跪俛伏興舉麾鼓祝奏太和之樂鼓吹振作皇帝出自西房即御座南向坐符寶郎奉寶置於御座如常樂止通事舍人引冊使副入就位太尉初入門舒和之樂作至位樂止立定典儀唱曰再拜贊

者承傳命羣官在位者皆再拜侍中前承制降請使者
前東北西面稱有制冊使再拜侍中宣制曰冊某氏為
皇后命公等執節展禮宣制訖又俱再拜侍中還侍位
黃門侍郎持節西面授太尉太尉受付主節立於使後
黃門侍郎退中書侍郎引冊案及琮璽綬案立於冊使
東北面中書侍郎取冊持案者退自使後
立於太尉之左西面授太尉
太尉受冊置於案持案者退立於使者後中書侍郎又
取琮璽綬以授太尉太尉受置於案皆如受冊之儀中

書侍郎退典儀曰再拜贊者承傳羣臣在位者皆再拜
通事舍人引冊使出持節者前導持案者次之太尉初
行樂作出門樂止侍中前奏稱侍中臣某言禮畢俛伏
興還侍位皇帝降座侍衛警蹕如來儀入自東房樂止
通事舍人引羣官在位者以次出

蕃客
先出

皇后受冊

前一日守宮於肅章門外道西近南隨使設太尉司徒
等次東向北上又於命婦朝堂設外命婦次如常尚寢

率其屬於皇后正殿設御幄座南向又設皇后受冊位於殿庭階間北向又設命婦等脫舄席於西階前近西東向太樂展宮懸之樂於殿庭設麾於殿上西階之西東向並如常內僕進重翟以下於肅章門外道東西向以北為上其日依時刻諸衛勒所屯門列仗及陳布於皇后殿正南門之內如常儀典儀設冊使位於肅章門外之西東向北上設內侍位於使副之南舉冊案及琮璽綬者位南向差退俱東面又設內給事位於北廂南

向又設內謁者監位於其東南西向內謁者設外命婦位於命婦朝堂分左右廂大長公主以下在東太夫人以下在西並每等異位重行南向以北為上司贊設內命婦及內官非供奉者位於受冊正殿之庭東廂西向重行北上又設內命婦等朝位於殿庭御道東行北面西上又設外命婦朝位於殿庭御道左右近南大長公主以下在東北面西上太夫人以下在道西每等異位重行北面以東為上又設司贊位於東階東南典贊二

人在南差退俱西向內侍版奏皇后請中嚴外命婦依時刻俱赴集朝堂次各服其服內謁者監先置二案於肅章門外近限太尉司徒既受命出至朝堂俱乘輅備鹵簿鼓吹持節如式其冊琮璽綬各以油絡網犢車載而行內侍之屬與所司守掌之至永安門外降輅謁者引入持節者前導持案者次之掌次者俱引入次內典引引外命婦就朝堂位司樂帥工人入就位典樂升就舉麾位司贊帥典贊先就殿庭位內典引各引外命婦

兩行俱以次進至肅章門司賓接引進入立於皇后正殿閤外如朝堂之位謁者引太尉以下就肅章門外持節者立於太尉之北少退東面內謁者監引內給事就南面位內謁者監退復位內命婦等應陪列者各服其服司賓引就陪列位尚儀版奏外辨皇后首飾褙衣司言引尚宮尚宮引皇后出自正殿西房侍衛警蹕如常儀

首飾褙衣

所司先進

典樂舉麾奏正和之樂

凡樂皆典樂舉麾鼓祝而後作偃麾

戛敵而後止

皇后至兩楹間南向立定樂止初內給事既就

南面位太尉進內給事前北向跪稱太尉封臣某司徒
封臣某奉制授皇后備物典冊訖俛伏興退復位內謁
者監引內給事詣肅章門傳告司言司言入詣皇后前
跪奏訖興還侍位初司言入奉冊琮璽綬者以次進當
司徒前司徒取冊琮璽綬以次進授太尉舉案者以次
退司徒授訖退復位內侍進太尉前西面以次受冊琮
璽綬東面授內謁者監量以內謁者
等助舉之退復位內謁者監
持冊琮璽綬等進立於肅章門外跪置冊琮璽綬於案

卷一百五十五
俛伏興初司言奏訖尚儀贊皇后降司言引尚宮尚宮
引皇后初行樂作立定樂止初皇后將降又尚宮詣門
取冊尚服詣門跪取琮璽綬興進俱立入於皇后之右
西向司言司寶各一人進立於皇后之左少前東向尚
宮稱有制尚儀贊皇后再拜尚宮宣冊訖尚儀又贊皇
后再拜尚宮奉冊進授皇后皇后受以授司言尚服又
奉琮璽綬以次授皇后皇后以授司寶訖尚儀贊皇后
升御座皇后御輿繖扇侍衛如常皇后升初行樂作即

御座南向坐司璽奉琮璽置於御座樂止司賓引內命婦等陪列者以次進就北面位為首者初行典樂舉麾舒和之樂作至位樂止司贊曰再拜掌贊承傳內命婦皆再拜司賓引為首者一人詣西階初行樂作至階樂止為首者脫舄升進當御座前北面跪奏某妃妾姓等言伏惟殿下坤象配天德昭厚載凡厥兆庶不勝慶躍訖起司賓引為首者自西階降納舄樂作復位樂止司贊曰再拜掌贊承傳內命婦等皆再拜司言前承令降

自西階詣內命婦西北東面稱令旨內命婦等皆再拜
宣令訖在位者又再拜司贊曰再拜典贊承傳在位者
皆再拜司賓以次從隨使出門各還其寢為首者初行
樂作至門樂止司賓又引外命婦以次入為首者初入
門舒和之樂作至位樂止立定司贊曰再拜掌贊承傳
外命婦等皆再拜訖司賓引為首者一人進升奉賀復
位拜樂止及宣令拜拜辭等皆如內命婦之儀訖引出
為首者初行樂作出門樂止司言又奏羣官賀訖尚儀

前跪奏稱尚儀妾姓言禮畢退還侍位皇后降座樂作
御輿入自東房侍衛警蹕如儀樂止女工人退冊命使
者乘輅詣朝堂至降輅入至太極殿庭大橫街南御道
東北面西上立中書令於太極殿東北西面太尉等再
拜復命曰奉制授皇后備物典冊禮畢又再拜中書令
奏聞太尉等退鹵簿幡節等還本司

皇后受羣臣賀

皇后表謝

朝皇太后

皇帝會羣臣

皇后會外命婦

皇后廟見

右並如納后儀

皇太子納妃儀

臨軒命使

將行納采制命使者吏部承以戒之前一日尚舍奉御設御幄於太極殿北壁下南向衛尉設羣官次於東西

朝堂太樂令展宮懸並如常儀其日典儀設文武一品以下五品以上位於橫街之北西面北上朝集使五品以上合班六品以下位於橫街南朝集使六品以下合班蕃客又於其南皆西面北上設武官五品以上位於橫街北東面北上朝集使五品以上合班諸親位於其南六品以下位於橫街南朝集使六品以下蕃客等又在南皆東面北上設典儀位於懸之東北贊者二人在南少退俱西向設舉麾位於殿上西階之西東面設使

者受命位於橫街南道東北面西上奉禮設門外位文
官一品以下五品以上位於順天門外道東每等異位
重行西面武官三品以下位於門西每等異位俱重行
東面以北為上未明二刻諸衛勒所部中門布黃麾半
仗入陳於殿庭如常儀羣官依時刻集朝堂俱就次各
服朝服侍中量時刻版奏請中嚴鈚戟近仗就陳於閤
外太極令以下帥工人入就位請侍衛之官各服其器
服侍中中書令以下諸侍臣俱謁閤奉迎典儀帥贊者

先入就位吏部兵部各贊羣官出次典謁各引就門外
位侍中版奏外辨皇帝服袞冕出坐如常儀通事舍人
引羣官以次入就位立定典儀曰再拜贊者承傳羣官
在位者皆再拜吏部與禮部侍郎贊使主副出典謁引
就受命位侍中前承制降詣使者西北東面稱有制使
主副俱再拜侍中宣制畢使主副又再拜侍中還侍位
典謁引使主副出初使者將出典儀曰再拜贊者承傳
羣官在位者皆再拜承傳通事舍人引羣官出侍中前

跪奏稱侍中臣某言禮畢俛伏興還侍位皇帝降座入
自東房侍衛警蹕如來儀侍臣從至閤使主副乘輅備
儀仗而行從者乘車以從

納采

前一日主人設使者次於大門之外道右南向其日大

昕使者公服至於妃氏大門外掌次者延入次

凡賓主
行事者

皆公
服

主人受其禮於廟

無廟者受
於正寢

掌事者布神席於室

戶外之西莞筵紛純加藻席畫純南向右雕几使者出

次謁者引立於大門外之西東面主人立於大門內西
儻者立於主人之左北面受命出立於門東西面曰敢
請事使者曰奉制作儻儲宮允歸令德率由舊章使某
納采儻者入告主人曰臣某之女不教若如人既蒙制
訪臣某不敢辭儻者出告掌畜者以鴈授使副進授使
者退復位使者左手執之儻者引主人迎於大門之南
北面再拜使者不答拜謁者引使者入門而左主人入
門而右使者升自西階立於楹間俱南面西上主人升

自東階進使者前北面使者曰某奉制納采主人降詣
階間北面再拜稽首升進北面受鴈退位於東階上西
面使者降自西階以出

問名

使者既出立於門外之西東面初使者降左右受鴈於
序端主人降立於內門東廂西面儻者進受命出請事
使者曰某將加卜筮奉制問名儻者入告主人曰制以
某之子備數於儲宮臣某不敢辭儻者出告掌畜者以

鴈授使副主人拜迎入俱升堂南面如納采儀使者曰
某奉制問名將加諸卜筮主人降詣階間北面再拜稽
首升進北面受鴈少退仍北面曰臣某第某女某氏出
使者降自西階出立於內門外之西東面初使者降主
人退於阼階東左右受鴈於序端主人降立於內門東
廂西面儋者進受命出請事使者曰禮畢儋者入告主
人曰某公為事故至某之室某有先人之禮謹禮從者

其儀與納

后禮賓同

納吉

前一日主人設使者次如常其日大昕使者至妃氏大門以下儐者出請事如納采儀使者曰加諸卜筮占曰協從制使某也納吉儐者入告主人曰臣某之子弗敬唯恐不堪龜筮云吉臣某謹奉典制儐者出告掌畜者以鴈授使副主人迎拜入俱升堂南面並如納采儀主人降詣階間北面再拜稽首升進北面受鴈使者降自西階立於大門外之西東面外初使者降主人還阼階

東左右受鴈於序端主人降立於內門西面賓者進受命出請事使者曰禮畢其賓使者皆如問名之儀

納徵

前一日主人設使者次如常儀其日大昕使者至妃氏大門外掌次者延入次執事者設布幕於內門之外元纁束帛陳於幕上乘馬陳於幕南北首西上執事者奉穀珪以匱俟於幕東西面主人掌事者設几筵如常使者出次謁者引立於大門外之西東面主人立於大門

內西面僂者進受命出請事使者曰制使某以玉帛乘馬納徵僂者入告主人曰奉制賜臣以重禮臣某祇奉典制僂者出告又僂者引主人迎於大門外之南北面再拜使者不答拜謁者引使者入門而左主人入門而右至於內門外使者立於門西東面北上主人立於門東西面執事者坐啟匱取珪加於元纁上興以授使副使副進授使者退復位使者受玉帛謁者引使者入門而左主人入門而右牽乘馬者從入三分庭一在南首

西上使者升自西階立於楹間俱南面西上主人升自東階進使者前北面使者曰某奉制納徵主人降階間北面再拜稽首升進北面受玉帛使者降自西階出立於內門外之西東面初使者降主人還阼階東左右受玉帛受馬自左受之以東牽馬者既授馬自前面出僎者進受命出請事使者曰禮畢其賓使者如納吉之儀

告期

前一日主人設次設几筵及僎者受命請事等並如納

采儀使者曰詢於龜筮某月某日吉制使某告期其授
鴈升堂受命之儀一如納采使者曰某奉制告期主人
降詣階間北面再拜以下禮畢如納采賓從使者如納
徵

告廟

有司以特牲告如常禮祝文臨時撰

冊妃

前一日主人設使者次如常設宮人次於使者西南俱

東面障以行幃其日奉禮設使者位於大門外之西東
向使副及內侍位於使者之南舉冊案及璽綬命服者
在南差退俱東向設主人位於門南北面設使者以下
及主人位於內門外皆如之設典內位於內門外主人
南西面設宮人位於門外於使者之後俱重行東向以
北為上障以行幃設贊者二人於東階東南西向典內
先置一案於閤外近限使主副朝服乘輅持節備儀仗
鼓吹備而不作至妃氏大門外使者降輅掌次者延入

次宮人等各之次掌嚴奉綸翟衣及首飾內廐尉進厭翟車於大門之外道之西東向以北為上諸尉率其屬布妃儀仗如常使者出次典謁引使者以下持節者前導及宮人典內各就位持節者立於使者之北少退俱東向主人朝服出迎於大門外之東西面立定少頃北面再拜使者不答拜典謁引使者持節者前導入門而左持案以下從之主人入門而右至內門外各就位立定奉冊寶案者進當使副前使副受冊寶奉案者退復

位使副以冊寶進授使者退復位內侍進使者前西面受冊寶東面授典內退復位典內持冊寶立入於閣外之西東面跪置冊寶於案典內俛伏興奉衣服及侍衛者從入皆立於典內之南俱東面北上傳姆贊妃出引立於庭中北面掌書進跪取玉寶興進立於妃前南向掌嚴奉首飾及綸翟與諸宮侍衛者次入侍衛如常典內還復位司則前贊妃再拜還侍位妃再拜司則進掌書前北面受冊寶進妃前南向授妃妃受以授司閨司

則又前贊妃再拜還侍位妃又再拜訖司則前請妃升座還侍位司閨引妃升座南向坐宮官以下俱降立於庭重行北向以西為上立定贊唱者曰再拜宮官以下皆再拜訖諸應侍衛者各升立於侍位司則前啓禮畢妃降座司閨引妃入室主人賓使者如禮賓之儀使者乘輅而還

臨軒醮戒

前二日本司宣攝內外各供其職前一日衛尉設次於

東朝堂之北西向又設宮官次於重明門外如常儀其
日前三刻宮官俱集於次各之次皆服其服諸衛各勒
所部依圖陳設左庶子贊請中嚴內僕進金輅於閤外
南向率一人執刀於輅前北向前二刻諸衛之官各服
其器服以次詣閤奉迎

左庶子負壘如式

宮官應從者各出次

立於門外文東武西重行相向北上左庶子奏外辨太
僕奮衣而升執轡皇太子著袞冕之服以出左右侍衛
如常儀皇太子乃升僕立授綏車驅左庶子以下夾侍

如常出門車權停令車右升輅陪乘宮臣上馬訖皇太子車動鼓吹振作如式文武官皆乘馬如常至承天門下車所廻輅南向左庶子進當輅跪奏稱左庶子臣某言請降輅俛伏興還侍位皇太子降輅典謁引舍人舍人引皇太子就位侍衛如常儀前一日尚舍奉御整設御座於太極殿阼階上西南衛尉設羣官次於朝堂太樂令展宮懸於殿庭乘黃令陳車輅並如常儀其日尚舍直長鋪皇太子席位於牖間南向

其席位筵紛純加藻席纈純

尚

食奉御設酒罇於東序下有坵加勺設冪實爵一又陳
邊脯一豆醢一在罇西晡前三刻典儀設羣官版位於
內奉禮設版位於外如朝禮諸衛勒所部屯門布仗立
仗入陳於殿庭羣官依時刻集朝堂俱就次各服其服
其侍中版奏請中嚴鉞戟近仗就陳於閤外太極令帥
工人入就位晡前三刻諸侍衛之官各服其器服侍中
中書令以下俱詣閤奉迎典儀帥贊者先入就次吏部
兵部贊羣官俱出次通事舍人各引就門外位侍中版

奏外辨皇帝服通天冠絳紗袍乘輿以出曲直華蓋警蹕侍衛如常儀皇帝將出仗動皇帝出自西房即御座西向坐符寶郎奉寶置於御座如常通事舍人引羣官以次入就位羣官立定典儀曰再拜贊者承傳羣官在位者皆再拜初羣官入訖典謁引舍人舍人引皇太子侍從如常式皇太子每行事左庶子執儀贊相至懸南北面立典儀曰再拜贊者承傳皇太子再拜典謁引舍人舍人引皇太子詣西階皇太子脫舄舍人引升就席西南面立尚食奉御酌

酒於序進詣皇太子西南東面立皇太子再拜受爵尚
食直長又薦脯醢於序前皇太子升薦座左執爵右取
脯擣於醢祭於籩豆之間右祭酒興降席西南面坐啐
酒奠爵再拜執爵興奉御受虛爵直長徹薦還於房舍
人引皇太子進當御座東面立皇帝命曰往迎爾相承
我宗事勗帥以敬皇太子曰謹奉制旨遂再拜舍人引
皇太子降自西階納舄訖典謁引舍人舍人引皇太子
出門典儀曰再拜贊者承傳羣官在位者皆再拜通事

舍人引羣官以次出侍中前跪奏稱侍中臣某言禮畢
俛伏興還侍位皇帝降座入自東房警蹕侍衛如來儀
侍臣從至閣

親迎

前一日衛尉設皇太子次於妃氏大門之外道西南向
設侍衛羣官次於皇太子次西南東向北上皇太子旣
受命遂適妃第執燭馬前鼓吹振作如式侍從如常皇
太子車至妃氏大門外次前迴輅南向左庶子進當輅

前跪奏稱左庶子臣某言請降輅俛伏興還侍位皇太子降輅之次車將至主人設几筵如常醴女如別儀妃服褕翟花鈿立於東房侍從如常主婦衣禮衣鈿釵立於房戶外之西南向主人公服出立於大門之內西面

在廟則主人以下著祭服

儼者公服立於主人之左北向左庶子前

跪奏稱左庶子臣某言請就位俛伏興還侍位皇太子出次立於門西東面侍衛警蹕如常儼者進受命出門東西面曰敢請事左庶子承傳進跪奏如常皇太子曰

以茲初婚某奉制承命左庶子俛伏興傳於儻者入告
主人曰某謹敬具少頃儻者出傳於左庶子奏如初儻
者引主人迎於門外之東西面再拜左庶子前跪奏稱
左庶子臣某言請答俛伏興還侍位皇太子答再拜主
人揖皇太子先入掌畜者以鴈授左庶子進東南向奉
授皇太子既執鴈進入侍衛者量入侍從及內門主人
讓曰請皇太子入皇太子曰某弗敢先主人又曰固請
皇太子入皇太子曰某固不敢先主人揖入皇太子從

入皇太子入門而左主人入門而右內門主人揖入內
雷將曲揖當階揖皇太子皆報揖至於階主人曰請皇
太子升皇太子曰某敢辭主人曰固請皇太子升皇
太子曰某固敢辭主人又曰終請皇太子升皇太子又
曰某敢終辭主人揖皇太子報揖主人升立於阼階上
西面皇太子升進當房戶前北面跪奠鴈俛伏興再拜
降出主人不降送內廐尉進厭翟於內門外傅姆導妃
司則前引出於母左傅姆在右保姆在左

執燭及侍
從如式

父

少進西面戒之必有正焉若衣若花命之曰戒之敬之
夙夜無違命母戒之西階上施衿結帨命之曰勉之敬
之夙夜無違庶母及門內施鞶申之以父母之命命之
曰恭敬聽宗父母之言夙夜無愆視諸衿鞶妃既出內
門至輅後皇太子授綏母辭不受曰未教不足與為禮
妃升輅乘以几姆加幃皇太子御輪三周馭者代之皇
太子出大門乘輅還宮侍衛如來儀妃仗次於後主人
使其屬送妃以僎從

同牢

其日司閨設妃次於東閭內道東南向掌筵鋪褥席將
夕司閨設皇太子幄於殿室西廂東向鋪地重茵施屏
障設同牢之席於室內皇太子之席西廂南向妃東廂
西向席皆莞筵紛純
加藻席纁純席間量容牢饌典膳監設洗於東

階東南東西當雷南北以堂深壘水在洗東篚在洗西

南肆篚實以二爵設妃洗在東房筵北壘水在洗西篚在

洗東北肆皆加勺巾冪典膳監先設饌於房西牖下簋

豆各二十簋簋各二鉶各三瓦甗一皆加巾罍蓋俎三

罇在室內北牖下元酒在西加罍勺南柄

罍夏用絺冬用絺

罇

在房戶外之東無元酒篚在南實四爵合

其器皆烏漆惟甗以

陶甗以甗

皇太子車至侍臣下馬所車權停文武侍臣皆下

馬車左降立於輅右車動車右夾輅而趨車至左閭迴

輅南向左庶子進當輅前跪奏稱左庶子臣某言請降

輅俛伏興還侍位皇太子降輅入俟於內殿門外之東

西面侍衛如常儀庶子以下皆退妃至宮門鹵簿仗衛

停於門外近侍者從如常入至左閣外迴輅南向司則
進當輅前啓請妃降輅掌筵依式執扇前後執燭如常
儀妃降輅就次整飾司閨引妃詣內殿門西東面皇太
子揖妃以入又司閨前升自西階妃後升執扇燭者陳
於東西階內皇太子即席東向立妃即席西向立司饌
進詣階間北面跪奏稱司饌妾姓言請具牢饌興司則
承令曰諾司饌帥其屬升奉饌入設於皇太子及妃座
前醬在席前醢醢在其北俎三入陳於豆東豕俎特於

俎北

豆東菹醢之東

司饌設黍於醬東

饌在西也

設對醬於東

對醬婦醬

也設之當特俎

菹醢在其南北上設黍於豕俎北其西稷稻粱

設清於醬北司饌啓會於簠簋之南對簠簋於北

啓發也豆

蓋徹於房內

各加匕箸設訖司饌北面跪奏饌具興皇太子

及妃俱坐司饌跪取脯擣於醢取韭菹擣醢授皇太子

又司饌取脯擣於醢取韭菹擣醢授妃皇太子及妃受

俱祭於籩豆之間司饌興取黍實於左手徧取稷反於

右手授皇太子又司饌取黍實於左手徧取稷反於右

手授妃皇太子及妃各受祭於菹醢之間司饌俱興各立取肺皆絕末跪授皇太子及妃俱受又祭於菹醢之間司饌俱以肺加於俎掌嚴授皇太子巾又掌嚴授妃巾皇太子及妃俱悅手以枳扱上鉶徧擣之祭於上豆之間司饌品嘗皇太子饌又司饌品嘗妃饌司饌各移黍置於席上以次跪授肺脊皇太子及妃皆食以滑醬三飯卒食司饌北面跪奏稱司饌妾姓言請進酒司則承令曰依奏興司饌北面俱盥手洗爵於房入室詣酒

罇所酌酒進北面立皇太子及妃俱再拜興一人進授爵皇太子一人以爵授妃皇太子及妃俱受爵司饌俱退北面答再拜皇太子及妃俱坐皇太子及妃俱祭酒司饌各以肝從司則俱進受虛爵奠於篚司饌又俱洗爵酌酒再酌皇太子及妃俱受爵俱飲司則進受虛爵奠於篚三酌用色如禮再拜皇太子及妃立於席後司則降東階洗爵升酌於戶外罇進北面俱奠爵興再拜皇太子及妃俱答拜司則俱坐取爵祭酒遂飲卒爵奠

爵遂拜執爵興降奠爵於篚還侍位司饌北面奏稱司饌妾姓言牢饌畢司則承令曰諾司饌徹饌設於房司則前跪奏稱司則妾姓言請殿下入俛伏興還侍位皇太子入於東房釋冕服著袴褶司則啓妃入幃幄皇太子及妃俱入室膳餽皇太子之饌御餽妃之饌

妃朝見

其日晝漏上水一刻所司列御座於所御殿阼階上西

面

其席莞筵紛純如藻席畫純次席黻純左右玉几

司設設皇后座於室戶外

之西近北南向尚食帥司膳設酒罇於房內東壁下有

坩加勺罇

罇用瓦甒實以醴酒

籩一豆一實以脯醢設於罇北又

設洗於東房近北罍水在洗西篚在東北肆

篚實以巾罍一

一其日夙興妃沐浴司則啓請妃內嚴質明諸衛帥其

屬陳布儀仗如常儀近仗入陳於寢門外內廐尉進厭

翟於正寢西階之前南向司則啓外辨妃服褕翟加首

飾以出降自西階升輅侍衛如常至降車所司則贊妃

降輅司言引妃入仗衛停於閤外障扇侍從如常妃至

寢門之外立於西廂東面諸衛勒所部屯門布仗三仗入陳於所御殿閣外如常侍中奏請皇后內嚴妃既至寢門侍中版奏外辨皇帝服通天冠絳紗袍以出升自阼階即御座西向坐侍衛如常儀尚儀又奏皇后外辨皇后褙衣首飾司言引尚宮尚宮引皇后出即御座南向坐侍從如常妃奉筭棗栗司饌又執奉筭股脩以從司則引妃入立於庭北再拜司賓引妃升自西階進東面跪奠筭於御座前皇帝撫之尚食進徹以東司言引

妃自西階降復北面位奉筭殿脩再拜司言引妃升進
北面跪奠筭於皇后座前皇后撫之尚食進徹以東司
言引妃退立於西序東面又再拜司設設妃席於戶牖
之間近北面南向司言引妃立於席西南向尚食又入
東房盥手洗觶酌醴齊加柶面柄出進詣妃席前北向
立妃進東面再拜受醴尚食薦脯醢於席妃升席坐左
執觶右取脯擣於醢祭於籩豆之間以柶祭醴三始扱
一祭又扱再祭降席進東面跪取觶興即位席坐奠觶

於薦東興降席司賓引妃降自西階出閤乘車還宮障
扇侍從如來儀

會羣臣

皇帝會羣臣於太極殿如正至之儀唯上壽辭云皇太
子嘉聘禮成克崇景福臣某等不勝慶忭謹上千秋萬
歲壽

文獻通考卷二百五十五